
IS-BWYLLGOR TRWYDDEDU CANOLOG 09.07.14

Yn bresennol: Cyng. Peter Read, Cyng Ann Williams, Cyng. Llywarch Bowen Jones

Hefyd yn bresennol: Mr Ian Williams (Cydlynnydd Trwyddedu Heddlu Gogledd Cymru), Mr Jeff Hall (Gwasaneth Tan ac Achub Gogledd Cymru), Geraint Brython Edwards (Cyfreithiwr), Gwenan M Williams (Rheolwr Gwarchod Y Cyhoedd (Iechyd a Diogelwch a Thrwyddedu), Euron Thomas (Gwarchod y Cyhoedd) a Lowri H Evans (Swyddog Cefnogi Aelodau a Chraffu),

1. CROESO

Croesawyd pawb i'r cyfarfod gan y Cadeirydd, y Cyngorydd Peter Read. Cyflwynwyd y panel ar swyddogion i bawb oedd yn bresennol.

2. DATGAN BUDDIANT PERSONOL

Dim i'w nodi

3. MATERION BRYD

Dim i'w nodi

4. CAIS AM DRWYDDED EIDDO – GWYL GLASS BUTTER BEACH, CARREG Y DEFAID, LLANBEDROG

Ar ran yr eiddo: Mr Mark Duckworth a Mr Mark Durston (Sensation Group)

Ymddiheuriadau: PC Andy Vowel, Mr Stuart Wyn Jones

Atgoffwyd pawb o'r drefn gwrandawriad ac o bedwar egwyddor y Ddeddf Trwyddedu 2003 fydd angen eu hystyried wrth wneud penderfyniad.

Gofynnodd y Swyddog Tân am ganitâd i gyflwyno sylwadau gerbron yr Is-bwyllgor.

Cyfeiriwyd yr Is-bwyllgor gan Gyfreithiwr y Cyngor i Reoliadau 17 ac 18 o'r Rheoliadau Deddf Trwyddedu 2003 (Gwrandawiadau) 2005.

Nododd pawb o'r partion yn bresennol eu bod yn cydsynio i'r cais ac felly rhoddwyd caniatâd i'r Swyddog Tân gyflwyno sylwadau yn ystod y gwrandawriad.

Cyfeiriwyd yr Is-bwyllgor gan Gyfreithiwr y Cyngor i Reoliad 24 o'r Rheoliadau Deddf Trwyddedu 2003 (Gwrandawiadau) 2005. Penderfynodd yr Is-bwyllgor osod uchafswm o 20 munud fesul parti ar gyfer cyflwyno sylwadau.

Adroddiad ac argymhelliad yr Adain Trwyddedu.

Cyflwynwyd adroddiad y Rheolwr Trwyddedu yn manylu ar gais Gŵyl Glass Butter Beach am drwydded o'r newydd. Nodwyd bod trwydded wedi bod mewn bodolaeth ar gyfer yr ŵyl mewn lleoliad arall.

Rhoddwyd manylion am yr oriau cyfredol a'r oriau arfaethedig.

Rhestrwyd hefyd y mesurau a argymhellwyd gan yr ymgeisydd i hyrwyddo'r amcanion trwyddedu.

Yn dilyn cyfnod ymgynghori priodol, derbyniwyd sylwadau ar y cais gan Gyngor Cymuned Llanbedrog yn nodi yn bennaf nad oedd ganddynt lawer o wybodaeth am y cais ond, wedi bod yn

gefnogol i'r wyl yn y gorffennol. Gwnaed sylw nad oedd y Cyngor Cymuned yn gefnogol i werthiant alcohol tu allan i'r prif safle ar y traeth.

Derbyniwyd hefyd wrthwynebiad gan breswyllydd cyfagos yn mynegi ei bryderon bod caniatáu y cais yn tansilio'r pedwar amcan trwyddedu, Rhwystro Trosedd ac Anhrefn, Diogelwch y Cyhoedd, Rhwystro Niwsans Cyhoeddus ac Amddiffyn Plant rhag Niwed

Wrth ystyried y cais dilynwyd y drefn ganlynol:-

- Rhoddwyd cyfle i aelodau'r Is-bwyllgor a'r ymgeisydd ofyn cwestiynau i'r Rheolwr Trwyddedu.
- Gwahoddwyd yr ymgeisydd i ymhelaethu ar y cais
- Rhoddwyd cyfle i'r ymgynghorai gefnogi eu sylwadau
- Gwahoddwyd deilydd y drwydded neu ei gynrychiolydd i ymateb i'r sylwadau
- Rhoddwyd cyfle i aelodau'r Is-bwyllgor ofyn cwestiynau i ddeilydd y drwydded.
- Rhoddwyd cyfle i aelodau'r Is-bwyllgor ofyn cwestiynau i'r ymgynghorai.

Cafodd yr ymgeisydd gyfle i ymhelaethu ar ei gais. Nododd bod trwydded gyffelyb ganddo eisoes ar gyfer yr Wyl, ond bod angen trwydded o'r newydd gan fod safle newydd i'r Wyl. Amlygodd nad oedd wedi gwneud cais am weithgareddau trwyddedig ar gyfer dydd Sul. Ei brif nod oedd creu awyrgylch hwyliog a chyfeillgar yn canolbwyntio ar ddefnydd o'r traeth.

Derbyniodd bod y lefel sŵn yn uwch na'r lefel dderbyniol yn 2011 a bod rhegi uchel dros yr uwch seinydd. Sicrhodd bod camau wedi eu gweithredu i ymateb i hyn. Ni dderbyniwyd cwynion am lefelau sŵn na rhegi yn 2013. Nodwyd bod polisi ymddygiad da wedi ei fabwysiadu a bod cwmni allanol wedi eu penodi i sicrhau bod y polisi yn cael ei gyfarch.

Yr ymgeisydd yn nodi ei barodrwydd i gydweithio gyda'r gwasanaethau brys. Nodwyd bod Cwmni Glanhau Proffesiynol yn glanhau'r traeth cyn ac ar ddiwedd yr Wyl, bod cwmni Meddygol Proffesiynol a Chwmni Diogelwch Proffesiynol yno i sicrhau iechyd a diogelwch y cyhoedd.

Adroddodd cynrychiolydd o'r heddlu nad oedd tystiolaeth i wrthwynebu'r cais i symud safle.

Mynegwyd bod 3 cwyn wedi ei dderbyn yn 2011 oherwydd lefelau sŵn. Cyfeiriwyd y cwynion hyn ymlaen i Adran Gwarchod y Cyhoedd; Cafodd yr Wyl ei chanslo yn 2012 oherwydd tywydd drwg; Yn 2013 derbyniwyd un cwyn. Nid oes gofyn statudol i'r Wyl gael ei phlisma ond cadarnhawyd parodrwydd yr ymgeisydd i gydweithio ac ymgynghori â 'Diogelwch Digwyddiadau'.

Cyfeiriwyd at bryderon yr heddlu lleol mai ychydig o 'draeth' sydd ar y safle a beth oedd ystyriaethau'r ymgeisydd i gyfarch hyn.

Mewn ymateb i'r pryder, cydnabu yr ymgeisydd y bydd llanw uchel ar y penwythnos a bod y digwyddiadau yn debygol o gael eu hail leoli / addasu oherwydd y llanw. Bydd y traeth yn cael ei ddefnyddio am amser cyfyngedig. Ni fydd bar na llwyfan yn cael eu hadeiladu ar y traeth. Bydd rheolaeth effeithiol o'r traeth - yr ymgeisydd eto yn barod iawn i gydweithio a thrafod yr opsiynau i sicrhau'r balans cywir.

Cydnabuwyd bod llythyr wedi ei dderbyn gan Mr Stuart Wyn Jones yn gwrthwynebu y cais.

Adroddodd cynrychiolydd o Adran Gwarchod y Cyhoedd nad oedd gan yr Adran wrthwynebiadau dwys i'r cais o ran rheolaeth sŵn. Yn dilyn ymweliad safle i'r lleoliad newydd, nodwyd bod y safle yn addas ar gyfer yr Wyl o ran sŵn yn benodol gyda byffer digonol rhwng maes yr Wyl a thrigolion cyfagos. Cyfeiriwyd at restr o 11 amod sŵn a oedd wedi eu cyflwyno i'r ymgeisydd. Nid oedd gan yr ymgeisydd unrhyw wrthwynebiad i'r amodau. Trafodwyd y monitro a wnaed i'r lefelau sŵn yn y ddwy wyl flaenorol a'r tebygolrwydd yw y bydd monitro sŵn eto eleni i sicrhau bod yr amodau yn cael eu cyfarch.

Mewn ymateb i gwestiwn gan y panel, nodwyd nad oedd eiddo o fewn 500 – 600m i'r safle.

Cydnabuwyd bod llythyr wedi ei dderbyn gan Cyngor Cymuned Llanbedrog.

Adroddodd cynrychiolydd o'r Gwasanaeth Tan nad oeddynt yn gwrthwynebu'r cais, ond bod rhaid i'r Gwasanaeth Tan dderbyn Asesiad Risg o'r sefyllfa.

Mewn ymateb i'r cais, nododd yr ymgeisydd y bydd asesiad risg ar gael i'r Gwasanaeth Tan yn ddibynnol ar benderfyniad yr Is Bwyllgor Trwyddedu.

Gadawodd y partiön perthnasol y cyfarfod.

Trafodwyd y cais gan aelodau'r Is Bwyllgor gan ystyried yr holl dystiolaeth a gyflwynwyd gan roddi sylw penodol i egwyddorion Deddf Trwydded 2003 sef

- Rhwystro Trosedd ac Anhrefn
- Diogelwch y Cyhoedd
- Rhwystro Niwsans Cyhoeddus
- Amddiffyn Plant rhag Niwed

Roedd yr Is Bwyllgor o'r farn y dylid caniatáu'r cais, ac ar sail y sylwadau ysgrifenedig a llafar a dderbyniwyd, y cais yn gydnaws â'r amcanion trwyddedu.

PENDERFYNWYD

Caniatáu trwydded eiddo yn ddarostyngedig bod yr amodau a argymhellwyd mewn sylwadau gan Adran Iechyd Amgylcheddol y Cyngor yn cael eu hymgorffori fel amodau ar y drwydded. Bydd y drwydded yn cychwyn ar 14 Awst 2014.

Adroddodd y Cyfreithiwr y byddai'n anelu at anfon llythyr yn cadarnhau yn ffurfiol i bawb oedd yn bresennol benderfyniad yr Is-bwyllgor.

Dechreuodd y cyfarfod am 10:30am a daeth i ben am 11:20am